

Mika

¹ Neno la BWANA lilimjia Mika, Mmoreshethi, wakati wa utawala wa Yothamu, Ahazi na Hezekia, wafalme wa Yuda; ufunuo aliouona kuhusu Samaria na Yerusalemu.

² Sikieni, enyi mataifa, enyi nyote,
sikilizeni, ee dunia na wote mliomo ndani yake,
ili BWANA Mwenyezi ashuhudie dhidi yenu,
Bwana kutoka Hekalu lake takatifu.

Hukumu Dhidi Ya Samaria Na Yerusalemu

³ Tazama! BWANA anakuja kutoka mahali pake;
anashuka na kukanyaga
mahali palipoinuka juu pa dunia.

⁴ Milima inayeyuka chini yake
na mabonde yanagawanyika
kama nta mbele ya moto,
kama maji yatiririkayo kasi
kwenye mteremko.

⁵ Yote haya ni kwa sababu ya kosa la Yakobo,
ni kwa sababu ya dhambi za nyumba ya
Israeli.

Kosa la Yakobo ni lipi?
Je, sio Samaria?

Je, mahali pa juu pa Yuda pa kuabudia miungu
ni nini?
Je, sio Yerusalemu?

6 “Kwa hiyo nitaufanya Samaria kuwa lundo la kokoto,
mahali pa kuotesha mizabibu.
Nitayamwaga mawe yake katika bonde
na kuacha wazi misingi yake.

7 Sanamu zake zote
zitavunjwa vipande vipande;
zawadi zake zote za Hekalu
zitachomwa kwa moto;
nitaharibu vinyago vyake vyote.
Kwa kuwa alikusanya zawadi zake
kutokana na ujira wa kahaba,
nazo zitatumika tena
kulipa mishahara ya kahaba.”

Kulia Na Kuomboleza

8 Kwa ajili ya hili nitalia na kuomboleza;
nitatembea bila viatu na tena uchi.
Nitabweka kama mbweha
na kuomboleza kama bundi.

9 Kwa sababu jeraha lake halitibiki;
limekuja Yuda.

Limefika hasa kwenye lango la watu wangu,
hata Yerusalemu kwenyewe.

10 Usiliseme hili huko Gathi;
usilie hata kidogo.

Huko Beth-le-Afra
gaagaa mavumbini.

11 Piteni mkiwa uchi na wenye aibu,
ninyi mkaao Shafiri.

Wale waishio Saanani
hawatatoka nje.

Beth-Eseli iko katika maombolezo;
kinga yake imeondolewa kwako.

- 12 Wale waishio Marothi wanagaaga kwa mau-
mivu
wakingoja msaada,
kwa sababu maangamizi yamekuja
kutoka kwa BWANA,
hata katika lango la Yerusalemu.
- 13 Enyi mkaao Lakishi,
fungeni farasi kwenye magari ya vita.
Mlikuwa chanzo cha dhambi
kwa Binti Sayuni,
kwa kuwa makosa ya Israeli
yalikutwa kwako.
- 14 Kwa hiyo utaipe Moresbeth-Gathi
zawadi za kuagana.
Mji wa Akzibu utaonyesha wazi udanganyifu
kwa wafalme wa Israeli.
- 15 Nitawaleteeni atakayewashinda
ninyi mnaoishi Maresha.
Yeye aliye utukufu wa Israeli
atakuja Adulamu.
- 16 Nyoeni nywele zenu katika kuomboleza
kwa ajili ya watoto wenu mnaowafurahia;
jifanyieni upara kama tai,
kwa kuwa watawaacha
na kwenda uhamishoni.

2

Mipango Ya Mwanadamu Na Ya Mungu

- 1 Ole kwa wale wapangao uovu,
kwa wale wafanyao shauri la hila vitandani
mwao!
Kunapopambazuka wanalitimiza
kwa sababu uko katika uwezo wao
kutekeleza.

² Wanatamani mashamba na kuyakamata,
pia nyumba na kuzichukua.

Wanamlaghai mwanaume nyumba yake,
mwanadamu mwenzake urithi wake.

³ Kwa hiyo, BWANA asema:

“Ninapanga maangamizi dhidi ya watu hawa,
ambayo hamwezi kujiokoa wenyewe.

Hamtatembea tena kwa majivuno,
kwa kuwa utakuwa ni wakati wa maafa.

⁴ Siku hiyo watu watawadhihaki,
watawafanyia mzaha
kwa wimbo huu wa maombolezo:

‘Tumeangamizwa kabisa;
mali ya watu wangu imegawanywa.

Ameninyang’anya!

Ametoa mashamba yetu kwa wasaliti.’ ”

⁵ Kwa hiyo hutakuwa na yeyote katika kusanyiko
la BWANA
wa kugawanya mashamba kwa kura.

Manabii Wa Uongo

⁶ Manabii wao husema, “Usitabiri.
Usitabiri kuhusu vitu hivi;
aibu haitatupata.”

⁷ Je, ingesemwa, ee nyumba ya Yakobo:
“Je, Roho wa BWANA amekasirika?
Je, yeye hufanya vitu kama hivyo?”

“Je, maneno yangu hayamfanyii mema
yeye ambaye njia zake ni nyofu?”

⁸ Siku hizi watu wangu wameinuka
kama adui.

Unawavua joho la kitajiri wale wanaopita

- pasipo kujali,
 kama watu warudio kutoka vitani.
 9 Unawahamisha wanawake wa watu wangu
 kutoka kwenye nyumba zao za kupendeza.
 Unaondoa baraka yangu
 kwa watoto wao milele.
 10 Inuka, nenda zako!
 Kwa maana hapa sio mahali pako pa
 kupumzikia,
 kwa sababu pametiwa unajisi,
 pameharibiwa, wala hapatengenezeki tena.
 11 Ikiwa mwongo na mdanganyifu atakuja na
 kusema,
 ‘Nitawatabiria divai na pombe kwa wingi,’
 angekuwa ndiye nabii
 anayekubalika na watu hawa!

Ahadi Ya Ukombozi

- 12 “Hakika nitawakusanya ninyi nyote, ee
 Yakobo,
 Hakika nitawaleta pamoja mabaki ya Israeli.
 Nitawaleta pamoja kama kondoo ndani ya zizi,
 kama kundi kwenye malisho yake,
 mahali hapa patakuwa na msongamano wa
 watu.
 13 Yeye afunguaye njia atawatangulia;
 watapita kwenye lango na kutoka nje.
 Mfalme wao atawatangulia,
 BWANA atakuwa kiongozi.”

3

Viongozi Na Manabii Wakemewa

- 1 Kisha nikasema,
 “Sikilizeni enyi viongozi wa Yakobo,

enyi watawala wa nyumba ya Israeli.
 Je, hampaswi kujua hukumu,
 ² ninyi mnaochukia mema
 na kupenda maovu;
 ninyi mnaowachuna watu wangu ngozi
 na kuondoa nyama kwenye mifupa yao;
³ ninyi mnaokula nyama ya watu wangu,
 mnaowachuna ngozi
 na kuvunja mifupa yao vipande vipande;
 mnaowakatakata kama nyama
 ya kuwekwa kwenye sufuria
 na kama nyama
 ya kuwekwa kwenye chungu?"

⁴ Kisha watamlilia BWANA,
 lakini hatawajibu.

Wakati huo atawaficha uso wake
 kwa sababu ya uovu waliotenda.

⁵ Hili ndilo asemalo BWANA:
 "Kuhusu manabii wanaowapotosha watu
 wangu,
 mtu akiwalisha,
 wanatangaza 'amani';
 kama hakufanya hivyo,
 wanaandaa kupigana vita dhidi yake.

⁶ Kwa hiyo usiku utawajieni, msiweze kuwa na
 maono,
 na giza, msiweze kubashiri.
 Jua litawachwea manabii hao,
 nao mchana utakuwa giza kwao.

⁷ Waonaji wataaibika
 na waaguzi watafedheheka.
 Wote watafunika nyuso zao

kwa sababu hakuna jibu litokalo kwa Mungu.”

- ⁸ Lakini kuhusu mimi, nimejazwa nguvu,
nimejazwa Roho wa BWANA,
haki na uweza,
kumtangazia Yakobo kosa lake,
na Israeli dhambi yake.
- ⁹ Sikieni hili, enyi viongozi wa nyumba ya Yakobo,
enyi watawala wa nyumba ya Israeli,
mnaodharau haki
na kupotosha kila lililo sawa;
- ¹⁰ mnaojenga Sayuni kwa kumwaga damu
na Yerusalemu kwa uovu.
- ¹¹ Viongozi wake wanahukumu kwa rushwa,
na makuhani wake wanafundisha kwa malipo,
nao manabii wake wanatabiri kwa fedha.
Hata hivyo wanamwegemea BWANA na kusema,
“Je, BWANA si yumo miongoni mwetu?
Hakuna maafa yatakayotupata.”
- ¹² Kwa hiyo kwa sababu yenu,
Sayuni italinwa kama shamba,
Yerusalemu itakuwa lundo la kokoto,
na kilima cha Hekalu
kitakuwa kichuguu
kilichofunikwa na vichaka.

4

Mlima Wa BWANA (Isaya 2:2-4)

- ¹ Katika siku za mwisho
mlima wa Hekalu la BWANA utaimarishwa

kama mlima mkuu miongoni mwa milima
yote;
utainuliwa juu ya vilima,
na watu wa mataifa watamiminika humo.
² Mataifa mengi yatakuja na kusema,
“Njooi, twendeni mlimani mwa BWANA,
kwenye nyumba ya Mungu wa Yakobo.
Atatufundisha njia zake,
ili tuweze kuenenda katika mapito yake.”
Sheria itatoka Sayuni,
neni la BWANA litatoka Yerusalemu.
³ Atahukumu kati ya mataifa mengi,
na ataamua migogoro ya mataifa
yenye nguvu na yaliyo mbali.
Watafua panga zao ziwe majembe,
na mikuki yao kuwa miundu ya kukata
matawi.
Taifa halitainua upanga dhidi ya taifa jingine,
wala hawatajifunza vita tena.
⁴ Kila mtu ataketi chini ya mzabibu wake
na chini ya mtini wake,
wala hakuna mtu atakayewaogopesha,
kwa kuwa BWANA Mwenye Nguvu Zote ame-
sema.
⁵ Mataifa yote yanaweza kutembea
katika jina la miungu yao;
sisi tutatembea katika jina la BWANA
Mungu wetu milele na milele.

Mpango Wa BWANA

⁶ “Katika siku hiyo,” asema BWANA,
“nitawakusanya walemavu;
nitawakusanya walio uhamishoni
na wale niliowahuzunisha.

⁷ Nitawafanya walemavu kuwa mabaki,
wale waliofukuzwa kuwa taifa lenye nguvu.
BWANA atatawala juu yao katika Mlima Sayuni
kuanzia siku hiyo na hata milele.

⁸ Lakini kuhusu wewe, ee mnara wa ulinzi wa
kundi,
ee ngome ya Binti Sayuni,
milki ya awali itarudishwa kwako,
ufalme utakuja kwa Binti Yerusalemu.”

⁹ Kwa nini sasa unalia kwa nguvu:
kwani huna mfalme?
Je, mshauri wako amekufa, hata maumivu
yakukamate
kama ya mwanamke
aliye na utungu wa kuzaa?

¹⁰ Gaagaa kwa utungu, ee Binti Sayuni,
kama mwanamke mwenye utungu wa
kuzaa,
kwa kuwa sasa ni lazima uuache mji
ukapige kambi uwanjani.
Utakwenda Babeli;
huko utaokolewa.
Huko BWANA atakukomboa
kutoka mikononi mwa adui zako.

¹¹ Lakini sasa mataifa mengi
yamekusanyika dhidi yako.
Wanasema, “Mwache anajisiwe,
macho yetu na yatazame Sayuni kwa fu-
raha!”

¹² Lakini hawayajui
mawazo ya BWANA;
hawauelewi mpango wake,

yeye awakusanyaye kama miganda
kwenye sakafu ya kupuria.

¹³ “Inuka upure, ee Binti Sayuni,
kwa kuwa nitakupa pembe za chuma;
nitakupa kwato za shaba
na utavunja vipande vipande mataifa
mengi.”

Utatoa mapato yao waliopata kwa udanganyifu
kwa BWANA,
utajiri wao kwa Bwana wa dunia yote.

5

Mtawala Aliyehidiwa Kutoka Bethlehemu

¹ Panga majeshi yako, ee mji wa majeshi,
kwa kuwa kuzingirwa kumepangwa dhidi
yetu.

Watampiga mtawala wa Israeli
shavuni kwa fimbo.

² “Lakini wewe, Bethlehemu Efrathi,
ingawa u mdogo miongoni mwa koo za
Yuda,

kutoka kwako atatokea kwa ajili yangu
yeye atakayekuwa mtawala katika Israeli,
ambaye asili yake ni kutoka zamani,
kutoka milele.”

³ Kwa hiyo Israeli utaachwa mpaka wakati
mwanamke aliye na utungu atakapozaa
na ndugu zake wengine warudi
kujiunga na Waisraeli.

⁴ Atasimama na kulichunga kundi lake
katika nguvu ya BWANA,
katika utukufu wa jina la BWANA Mungu
wake.
Nao wataishi kwa usalama, kwa kuwa wakati
huo
ukuu wake utaenea hadi miisho ya dunia.
⁵ Naye atakuwa amani yao.

Ukombozi Na Uharibifu

Wakati Mwashuru atakapovamia nchi yetu
na kupita katika ngome zetu,
tutawainua wachungaji saba dhidi yake,
hata viongozi wanane wa watu.

⁶ Wataitawala nchi ya Ashuru kwa upanga,
nchi ya Nimrodi kwa upanga.
Atatuokoa kutoka kwa Mwashuru
atakapoivamia nchi yetu
na kuingia katika mipaka yetu.

⁷ Mabaki ya Yakobo yatakuwa
katikati ya mataifa mengi
kama umande kutoka kwa BWANA,
kama manyunyu juu ya majani,
ambayo hayamngoji mtu
wala kukawia kwa mwanadamu.

⁸ Mabaki ya Yakobo yatakuwa miongoni mwa
mataifa,
katikati ya mataifa mengi,
kama simba miongoni mwa wanyama wa msi-
tuni,
kama mwana simba miongoni
mwa makundi ya kondoo,
ambaye anaumiza vibaya na kuwararua

- kila anapopita katikati yao,
wala hakuna awezaye kuokoa.
- ⁹ Mkono wako utainuliwa juu kwa ushindi juu ya watesi wako, nao adui zako wote wataangamizwa.
- ¹⁰ “Katika siku ile,” asema BWANA, “nitaangamiza farasi zenu katikati yenu na kubomoa magari yenu ya vita.
- ¹¹ Nitaangamiza miji ya nchi yenu na kuziangusha chini ngome zenu zote.
- ¹² Nitaangamiza uchawi wenu na hamtapiga tena ramli.
- ¹³ Nitaangamiza vinyago vyenu vya kuchonga na mawe yenu ya ibada yatoke katikati yenu;
hamtasujudia tena kazi ya mikono yenu.
- ¹⁴ Nitang’oa nguzo za Ashera katikati yenu na kubomoa miji yenu.
- ¹⁵ Nitalipiza kisasi kwa hasira na ghadhabu juu ya mataifa ambayo hayajanitii.”

6

Shauri La BWANA Dhidi Ya Israeli

- ¹ Sikiliza asemalo BWANA:
“Simama, tetea shauri lako mbele ya milima; vilima na visikie lile unalotaka kusema.
- ² Sikilizeni, ee milima, mashtaka ya BWANA, sikilizeni, enyi misingi ya milele ya dunia.
Kwa kuwa BWANA ana shauri dhidi ya watu wake;
anatoa mashtaka dhidi ya Israeli.

3 “Watu wangu, nimewatendea nini?
 Nimewalemea kwa jinsi gani? Mnijibu.
 4 Nimewatoa kutoka Misri na kuwakomboa
 kutoka nchi ya utumwa.
 Nilimtuma Mose awaongoze,
 pia Aroni na Miriamu.
 5 Watu wangu, kumbukeni jinsi Balaki mfalme
 wa Moabu
 alivyofanya shauri
 na kile Balaamu mwana wa Beori alichojibu.
 Kumbukeni safari yenu kutoka Shitimu mpaka
 Gilgali,
 ili mfahamu matendo ya haki ya BWANA.”

6 Nimjie BWANA na kitu gani na kusujudu
 mbele za Mungu aliyetukuka?
 Je, nije mbele zake na sadaka za kuteketezwa,
 nije na ndama za mwaka mmoja?
 7 Je, BWANA atafurahishwa na kondoo dume elfu,
 au mito elfu kumi ya mafuta?
 Je, nimtoe mzaliwa wangu wa kwanza kwa ajili
 ya kosa langu,
 mfoto wangu mwenyewe
 kwa ajili ya dhambi ya nafsi yangu?
 8 Amekuonyesha yaliyo mema, ee mwanadamu.
 BWANA anataka nini kwako?
 Ila kutenda kwa haki na kupenda rehema,
 na kwenda kwa unyenyekevu na Mungu
 wako.

Hatia Na Adhabu Ya Israeli

9 Sikiliza! BWANA anauita mji:
 kulicha jina lako ni hekima:
 “Tii hiyo fimbo na yeye aliyeiamuru.

- 10 Je, bado nisahau, ee nyumba ya uovu,
hazina yako uliyopata kwa udanganyifu
na vipimo vilivyopunguka,
ambavyo vimelaaniwa?
- 11 Je, naweza kuhukumu kuwa
mtu mwenye mizani ya udanganyifu hana
hatia,
aliye na mfuko wa mawe ya kupimia ya
uongo?
- 12 Matajiri wake ni wajeuri;
watu wake ni waongo
na ndimi zao zinazungumza
kwa udanganyifu.
- 13 Kwa hiyo, nimeanza kukuharibu,
kuwaangamiza kwa sababu ya dhambi zenu.
- 14 Mtakula lakini hamtashiba;
matumbo yenu bado yatakuwa matupu.
Mtaweka akiba lakini hamtaokoa chochote,
kwa sababu mtakachoweka akiba
nitatoa kwa upanga.
- 15 Mtapanda lakini hamtavuna;
mtakamua zeituni lakini
hamtatumia mafuta yake.
Mtakamua zabibu
lakini hamtakunywa hiyo divai.
- 16 Mmezishika sheria za Omri
na matendo yote ya nyumba ya Ahabu,
tena umefuata desturi zao.
Kwa hiyo nitakutoa kwa maangamizi
na watu wako kuwa dhihaka;
mtachukua dharau za mataifa.”

7

Taabu Ya Israeli

- ¹ Taabu gani hii niliyo nayo!
Nimefanana na yule akusanyaye
matunda ya kiangazi,
aokotaye masazo baada ya kuvunwa
shamba la mizabibu;
hakuna kishada chenye matunda ya kula,
hakuna hata ile tini ya mwanzoni ninayoita-
mani.
- ² Wanaomcha Mungu wameondolewa kutoka
nchi;
hakuna mtu mnyofu hata mmoja aliyebaki.
Watu wote wanavizia kumwaga damu,
kila mmoja anamwinda ndugu yake kwa
wavu.
- ³ Mikono yote miwili ni hodari katika kufanya
ubaya,
mtawala anadai zawadi,
hakimu anapokea rushwa,
wenye nguvu wanaamuru wanachotaka:
wote wanafanya shauri baya pamoja.
- ⁴ Aliye mwema kupita wote kati yao
ni kama mchongoma,
anayeonekana mnyofu zaidi miongoni mwao
ni mbaya kuliko uzio wa miiba.
Siku ya walinzi wako imewadia,
siku atakayokutembelea Mungu.
Sasa ni wakati wao
wa kuchanganyikiwa.
- ⁵ Usimtumaini jirani;
usiweke matumaini kwa rafiki.
Hata kwa yule alalaye kifuani mwako
uwe mwangalifu kwa maneno yako.
- ⁶ Kwa kuwa mwana humdharau baba yake,
naye binti huinuka dhidi ya mama yake,

mkwe kuwa kinyume na mama mkwe wake:
 adui wa mtu ni wale wa nyumbani mwake
 hasa.

⁷ Lakini mimi, namtazama BWANA kwa matu-
 maini,
 namngoja Mungu Mwokozi wangu;
 Mungu wangu atanisikia mimi.

Israeli Atainuka

⁸ Usifurahie msiba wangu, ee adui yangu!
 Ingawa nimeanguka, nitainuka.

Japo ninaketi gizani,
 BWANA atakuwa nuru yangu.

⁹ Kwa sababu nimetenda dhambi dhidi yake,
 nitabeba ghadhabu ya BWANA,
 mpaka atakaponitetea shauri langu
 na kuithibitisha haki yangu.

Atanileta nje kwenye mwanga,
 nami nitaiona haki yake.

¹⁰ Kisha adui yangu ataliona
 naye atafunikwa na aibu,
 yule aliyeniambia,

“Yu wapi BWANA Mungu wako?”

Macho yangu yataona kuanguka kwake,
 hata sasa atakanyagwa chini ya mguu
 kama tope barabarani.

¹¹ Siku ya kujenga kuta zako itawadia,
 siku ya kupanua mipaka yako.

¹² Siku hiyo watu watakuja kwako
 kutoka Ashuru na miji ya Misri,
 hata kutoka Misri hadi Frati
 na kutoka bahari hadi bahari

- na kutoka mlima hadi mlima.
 13 Dunia itakuwa ukiwa kwa sababu ya wakazi wake,
 kwa sababu ya matunda ya matendo yao.

Sala Na Sifa

- 14 Wachunge watu wako kwa fimbo yako,
 kundi la urithi wako,
 ambalo linaishi peke yake msituni,
 katika nchi ya malisho yenye rutuba.
 Waache walishe katika Bashani na Gileadi
 kama ilivyokuwa siku za kale.
- 15 “Kama siku zile mlipotoka Misri,
 nitawaonyesha maajabu yangu.”
- 16 Mataifa yataona na kuaibika,
 waliondolewa nguvu zao zote.
 Wataweka mikono yao kwenye vinywa vyao
 na masikio yao yatakuwa na uziwi.
- 17 Wataramba mavumbi kama nyoka,
 kama viumbe vitambaavyo juu ya ardhi.
 Watatoka nje ya mapango yao wakitetemeka;
 watamgeukia BWANA Mungu wetu kwa hofu
 nao watakuogopa.
- 18 Ni nani Mungu kama wewe,
 ambaye anaachilia dhambi
 na kusamehe makosa
 ya mabaki ya urithi wake?
 Wewe huwi na hasira milele,
 bali unafurahia kuonyesha rehema.
- 19 Utatuhurumia tena,
 utazikanyaga dhambi zetu
 chini ya nyayo zako,

na kutupa maovu yetu yote
katika vilindi vya bahari.

²⁰ Utakuwa wa kweli kwa Yakobo,
nawe utamwonyesha Abrahamu rehema,
kama ulivyowaahidi kwa kiapo baba zetu
siku za kale.

Biblica® Toleo Wazi Neno: Biblia Takatifu™
Swahili: Biblica® Toleo Wazi Neno: Biblia
Takatifu™ (Bible)

copyright © 2018 Biblica, Inc.

Language: Kiswahili

Translation by: Biblica, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2021-04-12

PDF generated using Haiola and XeLaTeX on 18 Apr 2025 from source files dated 31 Aug 2023

9cbb05be-39f3-5d18-8b2a-4ba788541462